


Festival Voz-i-Landia Escolar y homenahe pa Robert Jeandor ta dia 19 proximo



ORANJESTAD - Proximo 19 di november pa 6.30 pm na Cas di Cultura lo ta un anochi musical dedica na Festival Voz-i-Landia Escolar y tambe un homenahe pa e icono musical Arubano y internacional Robert Jeandor.

Algun dia pasa na Biblioteca



Nacional Aruba a presenta den conferencia di prensa e buki 'Reluci' chispa musical cu ta relata e historia y memoria di e Festivalnan Voz-i-Landia Escolar for di 1981 te 2015.

Sr. Milton Lacle den e conferencia di prensa a introduci Jerund Oduber como e per-

sona responsabel di e buki cu su casa editor a produci e buki. Tambe el a presenta sr. Frank Richardson, cabesante di Fatima College. Manera sr. Lacle a bisa, dia 19 di november lo ta un atardi di canto, baile y musica. Scol di Movemento, bou di guia di Samantha Westera, ademas di Grupo Melodia di Rubi Pon-



son lo deleita publico cu diferente cancion popular.

Sr. Frank Richardson, cabesante di Fatima College a declara na e medionan di prensa cu esey ta un iniciativa primordialmente di sr. Milton y su casa sra. Jenny Lacle cu ta e escritor di e buki. Nan a cuminsa cu e proyecto di curason y esey el a aprecia. E ta forma parti di e grupo nobo di Voz-i-Landia cu a tuma over desde 2011 y 2013 tabata su prome festival. Te na e momentonan aki e ta parti di e comision y, manera el a bisa, "esaki ta un bunita regalo pa e pueblo di Aruba" pa motibo cu awo nan tin preto riba blanco e historia di e festival y tur loke e ta implica.

Tambe el a bisa cu e buki ta un empuhe pa nan pa e fundacion sigui bibo y pa engrandece e festival y bisa di unda el a nace. Sr. y sra. Lacle hunto cu otro hendenan tabata e palanca tras e festival aki y pa nan awo, cu ta e grupo nobo, por sigui cune y no lag'e muri nunca mas.

Sr. Richardson a bisa cu den proximo dianan lo anuncia e festival pa aña 2019 na tur scol. Tur scol ta bay ricibi e papelnan di inscripcion y asina ey lo anuncia pa e muchanan cuminsa prepara e cancionnan.

Di otro banda, e dia ey tambe lo haci un homenahe pa sr. Robert Jeandor. Nan lo presenta un documentario di e su desaroyo musical como musico, bahista, cantante, salsero, merengero, tumbero y bolerista.

Na e conferencia di prensa tambe tabata presente Consul di Republica Dominicana sr. Alfredo Mateo Zabala, cu a papia di loke e sr. Jeandor ta representa pa Republica Dominicana. E ta un icono musical naci na Aruba, pero

el a bay pa Republica Dominicana pa introduci un instrumento musical pa merengue, salsa dominicano y tur e tipo di musica cu sr. Jeandor tabatin e oportunidad di toca. E tabata un di e miho musiconan di su epoca cu e orkesta 'Los Hijos del Rey', un orkesta cu a nace pa duna un empuhe pa tur e artistanan dominicano y di otro nacionalidad pa yega na fama. Sr. Zabala a bisa cu e artistanan principal di Republica Dominicana cu a traha cu sr. Jeandor ta Fernando Villalona, Sergio Vargas, Bonny Cepeda, entre otro; tur a pasa na orkesta di 'Los Hijos del Rey'.

E trabou cu sr. Jeandor a haci durante su residencia na Republica Dominicana, y a destaca mas, tabata cu Jhonny Ventura. Sr. Consul a bisa cu "Republica Dominicana tin hopi pa gradici na sr. Robert Jeandor; Aruba tin un representante digno na Republica Dominicana".

Tambe el a splica cu e exito cu sr. Jeandor tabatin na Republica Dominicana tabata un merengue cu yama 'Dominicani' y e reconocimiento cu lo bay haci p'e ta hopi mereci. Sr. Robert Jeandor a relata na medionan di prensa cu e ta contento cu e trabou cu sr. Milton a haci pa forma y pa haci posibel e evento aki pa pueblo di Aruba, pa motibo cu sr. Lacle a bay cu sr. Robert pa Republica Dominicana pa busca informacion di loke el a haci na e pais ey.

E documentario lo estrena dia 19 di november y pueblo di Aruba lo por mira algo di su bida, loke el a haci internacionalmente. E l a gradici tur hende cu ta involvi den e proyecto y ta invita henter comunidad di Aruba pa wak loke Robert Jeandor ta como icono musical Arubano internacional.